

# Endesfida anter i miore joegn del mond sui portoes de Fascia

De firé del 2019 noscia val ge dèsc alberch ai Mondiei Junior, l più emportant event de schi per joegn. Na ocajon de gran valuta che auza fora la capacitèdes de endrez de noscia jent e fèsc aprijèr nosc teritorie

Evenc - Fascia é vertia a ge dèr alberch al più emportant event de schi per i joegn. Dai 18 ai 27 de firé sui portoes de Poza e sun Sèn Pelegrin vegn metù a jir la 38<sup>a</sup> edizion di Campionac Mondiei Junior, che vedarà se endesfidèr 500 atlec under 20 de 50 nazions per l'assegnazion de 11 titoi de campion del mond e 33 medaes.

L Skistadium de Aloch ge darà alberch a la garejèdes tecniches, la Volata sun Sèn Pelegrin enveze a la competizioni asveltes. A Cianacei ai 18 de firé l'é pervedù la zerimonia de inaugurazion, a Moena vegn enjignà l piaz de la medaes, a Pera l ski room e Soraga l'é la senta del Team Captain's Meeting.

N grum de gregn champions del schi à tout pèrt ai Mondiei Junior: l norvegeis Henrik Kristoffersen, 6 titoi mondiei junior, l'austriach Marcel Hirscher, 3 medaes de or, e amò Lindsey Vonn, Mikaela Shiffrin, Sofia Goggia, Federica Brignone e n muie de etres. L'an passà l svizer Marco Odermatt su la neif de cèsa l'à batù ogne record vadagnan 5 medaes.

Invern fascian dassen n muie rich donca, ence percheche la Federazion Internazionèla del Schi l'à pervedù te val 4 garejèdes de Copa Europa, ai 17 e 18 de dezember a Poza l'é en program doi slalom de ic e dai 15 ai 18 de jené sun Sèn Pelegrin doi juisses de eles. La garejèdes mondiesle taca ai 19 de firé e les va inant enscin ai 27 con slalom lèrch e strent de eles, super G de ic e de eles, Combinèda de ic e eles, slalom lèrch strent de ic e juissa de eles.

Tel passà chest event l'é stat organisà ti raions de schi più de nonzech al mond e dal 2019 ence Fascia vegnarà dombrèda anter chisc, con si 150 portoes de ogne dificoltà che sporc en dut 215 km da fèr coi



Te la comunicazion di Mondiei Junior de schi 2019 i retrac di voluntadives auza fora l leam fort anter chest event e l teritorie, con sia sociacions e la preziosa ressorsa del volontariat.



schi, al zenter del Dolomiti Superski, l più gran comprenjorie de schi de l mond. Da no desmentier i 16.000 posé let te hotel e i 39.000 anter cartieres e B&B.

L'é n event che premia la emportanta storia sportiva de Fascia, che ti egn à vedù se dejouer sacotanta competizioni de Copa Europa e manifestazions internazionèles e nazioneles, amò apede da passa 10 egn col projet Piste Azzurre l'é l zenter ofizial di alenamenc de la nazionele talièna, aprijà ence da desvaliva nazioneles forestes.

I Mondiei Junior 2019 à desche ambasciadores i atlec fascegn protagonisè te evenc internazionèl desche i slalomisè Chiara Costazza, Stefano Gross e Federico Liberatore, Mirko Felicetti, Caterina Carpano, Giorgia Locatin e Emil Zulian con la

brea, Caterina Ganz tel paslonch, l freestyler Igor Lastei e Giorgia Felicetti tel schi alpinism.

Alice Stroppa, studenta del Liceo Artistich de Poza, l'à dessegnà la mascotte ofiziala de l'event, "Neif", n fioch de neif coi bachec e i schi, che l'à ence la finalità de sostegnir n projet de solidarietà con la Fondazione Ospedèl Pediatric Meyer de Firenze.

## Passa 300 volontères al lurier

Per Fascia i campionac Mondiei Junior 2019 raprejeta na oportunità de meter a jir n endrez organisatì complicà e per fèr cognoscer la capacitèdes, l'efizienz e la dinamizità de la jent ladina. Endèna i 10 dis de manifestazion, ma ence ti test event de Copa Europa de dezember e jené,

no vegnarà lascià nia al cajo. L Comitad organisador vidà da Davide Moser, col secretèr generèl Filippo Bazzanella desche responsabol operatìf, l'é al lurier zenza paussa dal setember passà per proponer n event che posse lascèr l segn. E te chesta otica na pèrt strategica desche semper i l'è i volontères, coordiné da l'espert Alfredo Weiss e ence da Cristoforo Debertol, che à ence pervedù na sera dedichèda a ic, en program en vender ai 5 de otober da mesa les set da sera aló dal pavion manifestazions de Poza a Sèn Jan, dal titol "Na bela endesfida per na grana valèda!"

En dut l'é zirca 300 i volontères, per la maor pèrt da Fascia, touc ite per se cruzièr de ogne aspet de chest event internazionèl. Apede l lurier indispensabol de l'Apt de Fascia, di doi schi club Ski Team Fascia e Union

Sportiva Monti Pallidi, les à na pèrt ativa e strategica ence la cinch scoles de schi de la val, Cianacei Marmolèda, Ciampedel, Vajolet de Poza, Vich e Ciareja e Moena Dolomiti.

En pruma linia ence la Scola Ladina de Fascia, touda ite con i studenc te l'acolièza e te l'assistenza atlec e sui portoes con i bec del Ski College. Fèsc pèrt de l'endrez ence la aminztrazions comunèles e la sacotanta sociacions de volontariat del teritorie, con la doi emportanta realtèdes istituzionèles che laora sul teritorie, l Zenter de Adestrament Alpin de la Polizia de Stat, le Fiamme Oro de Moena, la Scola Alpina de la Guardia de Finanza de Pardac e del Grop Atlec Fiamme Gialle. L'é ence l'Università de Trent per se cruzièr di aspet de consulenza tecnologica. (mb/cr.m)